

摘藻堂四庫全書薈要

集部

欽定四庫全書薈要

集部
宋詩鈔卷十七

詳校官候選知縣臣吳甸華



欽定四庫全書薈要卷二萬二百七十

集部

宋詩鈔卷十七

內閣中書舍人吳之振編

韓維南陽集鈔

維字持國開封雍丘人父億參知政事維受蔭入官
父沒閉門不仕歐陽修薦為檢討知太常禮院出判
涇州英宗免喪除同修起居注侍邇英進知制誥知
通進銀臺引神宗初除龍圖閣直學士充羣牧使出

知襄州許州入為學士承旨會其兄絳入相出知河陽知許州提舉嵩山崇福宮召兼侍讀加太學士拜門下侍郎出知汝州以太子少傅致仕轉少師紹聖中坐元祐黨安置均州元符元年卒年八十二徽宗初追復舊官維同時唱和者為聖俞永叔其深遠不及聖俞溫潤不及永叔然古淡疎暢故足為兩家之鼓吹也醖醖絕句在集中不足數而世盛稱之古今豈有定論哉

講武池和師厚

滄池擬溟渤莽漾豁厚地日吾神祖為氣象固宜爾六
合昔未一教戰出精銳至尊降黃屋慘淡乘金氣凌波
飛百艘撇烈苦鶚翅揚旌萬旅譟伐鼓九淵沸其行速
天旋其止甚陰閉信乎王者師足以服睽異邇來承平
久地與兵革廢秋風長蒲葦爛熳失洲沚惟見金明上
結構銷繡綺春遊駐天蹕萬國奉燕喜鏗鐃鼓鐘響雜
還羽旄美豈惟與民樂施及魚鳥細宏哉艱難業愉快

逮萬世

答蘇子美見寄

暮春游京洛適與夫子邁衣焦未及展挈酒且相就佳
林延涼飈廣厦蔭清晝浩然塵慮醒坐看天骨秀殷勤
述平昔感歎道艱疚談辭足端倪懷抱去蒙覆志願始
云獲睽攜遽然又君舟既南馳我馬亦東走還譙寡儔
侶孤學日以陋高風邈難親離抱曷其救得君別後詩
滿紙字騰驟汪洋莫知極精密不可擄峻嚴山岳停奔

放江海漏伏讀書夜并文義僅通透有如享太牢繼以
金石侑惟君抱雄才文字乃兼副要當被金甲獨立諸
將右指揮神武師為國縛狂寇獻俘天子庭功以鍾鼎
鏤勉哉俊其時此論講已舊

送趙員外之官憲州

仲扶岷峨秀弱歲儒具冠讀書觀前古飽見萬事端行
已去畦町為文鄙彫剜應舉二十載不免瓢與簞西游
秦函國崆峒上巉岼却視關塞廣有如掌中丸攻守勢

所利浩然入窺觀是歲羌事作賊兵犯廊丹君懷濟時
略忠憤激肺肝上書伏兩觀音辭若琅玕臣策儻見用
坐令敵氣殫天子壯其語且使位以官黃綬繫腰下行
行不遑安炎天風塵多遠道車馬單餞觴不親酌曷致
朋友懽今茲塞垣將所在麾旄攢孰能謀而毅孰能正
以寬孰用賞不信孰為刑不殘諒非專達任易以奇畫
千庶幾成大功展子凌霄翰顧我頑鈍者託契歲屢寒
贈言非所工當否聊一看

答王詹叔見寄

詹叔好古者卓立自既冠有如騏驥兒一縱不可絆近
聞治周易顛倒爻象彖此書號精微義與天地貫吾知
子之道不止今所歎新詩溢巾幅見寄警庸懦噴薄百
丈泉峭絕萬仞岸感激氣為振把誦手屢盥陰風吹寒
城歲暮雲物換丈夫及壯時功烈當照爛無為但默默
飽食大軀幹為報乏瓊玖君其取章斷

立春觀杖牛

清霜涼初曙高門肅無譁行樹迎初日微風轉高牙茲
辰亦何辰見此氣候嘉有司謹春事象牛告田家微和
被廣陌纓弁揚黼葩伐鼓衆樂興剡剡綵杖加盛儀適
云已觀者何紛拏因思古聖人時敝在不差禮實久已
廢所重存其華吾非魯觀賓胡為亦咨嗟

魯恭太師廟

善政邈無跡其流在民心君看魯太師廟食猶至今豈
如文俗士朱墨坐浮沈趨營止目前不顧忠害深去漢

餘千載此弊竟相尋
我行道祠下感激為悲吟
不見田雉馴啼鴉空滿林

晚步

愛此霽景佳捨舟步高岸
夕陽照渡口急急水紋亂
霜鴉田間鳴沙鳥波上散
登臨豈非美當軫別後嘆

舟中夜坐

晴霜落波底斗柄插堤外
扁舟燈火明樽酒夜相對
臨歡意暫遣念離心已痠
篙師喜水圻理櫂事晨邁

別後作

朔風吹驚鴻行列失後先
蒼蒼雪壓船齒齒冰着岸離
馬聲正悲別臉淚猶泫却望攜手處危檣映林見

送王氏兄弟

抱疾伏田里晨昏結煩憂
如彼衣上垢歲久不可漱忽
聞車馬音來過吾廬幽相見一長慟悲風為遲留張燈
具餐飯涕泗稍復收南堂夜相對油然破離愁雖無盈
樽酒清論代獻酬高篇璨成誦翰寫殊不休娑娑雙鳳

凰對舞光彩浮忽然變瑰怪風霆拔金蚪傾聽魄已季何
暇測其由君家門閥大先世勤令猷晉公典冊文太尉
廊廟謀子孫今多才信矣陰德流還轅欲何語贈子詩
聿脩

讀杜子美詩

寒燈熠熠宵漏長顛倒圖史形勞傷取觀杜詩盡累紙
坐覺神氣來洋洋高言大義經比重往往變化安能常
壯哉起我不暇寐滿座歎息喧中堂唐之詩人以百數

羅列衆制何煌煌太陽垂光燭萬物星宿安得舒其芒
讀之踴躍精膽張徑欲追躡忘愚狂徘徊攬筆不得下
元氣混沌神無方

覽梅聖俞詩編

夙昔誦佳句跂予慕高風何意憂艱餘邂逅此相逢君
初應府辟捧檄來自東引車窮簷下眷然顧微躬姿表
穆以秀純德信內充乃知文章作中與性情通煌煌新
詩章垂光照昏蒙啟櫝挹荆璞引筵撞景鐘高篇屢云

闌遠思殊未終譬如巧琴師哀彈發絲桐中有冲淡意
要以心志窮顧惟昧者聽莫辨徵與宮安得牙曠手提
耳發其聰

西墅

城居不為愜言適西陂岡雀噪野堂靜雞鳴春日長書
棚落幽蠹佛慢掩餘香釋子廬巖至清談殊未央

對雨思蘇子美

五月陰盛暑不效飛雲日夕起嵩少回風颯颯吹暮寒

翠竹黃蕉雨聲鬧北軒孤坐默有念人生會合那可料
昔與子美比里閭是月秋近足霖潦吾徒無事數相遇
日策疲馬度深淖升君之堂伏君几果餌羅列亦稍稍
開樽得酒味已酢輔以諧謔聊可醕長歌激烈或孤起
大論紛紜時一譟颯然夜氣變淒栗連披短褐曳顛倒
且欣主人同氣類安問鄰家厭呼笑而今相望各千里
跼促有如魚在罩人生此樂不易得世事榮辱何足校
行當結侶候春水一訪洞庭湖上棹

和三哥入山

巢由沒已久風迹曠不嗣長嘯箕穎間悲風肅然至傳
聞龍山下茅屋架三四中有隱者棲讀書樂仁義飽觀
人事變深鈎易象秘耕田給衣食鄉里需賑遺呦呦山
鹿羣摩撫馴不畏乃知至仁心足以通異類聲名自馳
擊我心晏無累寤寐想斯人安得同所致

從道損舅乞移山藥

弱歲抱衰病好讀神農經雖然衆藥品猶識性與形商

餘巖谷間厥產芝朮菁山家乘冬採氣烈味亦并常思
負籠往斲此地氣靈近聞山旁縣移本來公庭石泉尚
含潤溪風有餘清想象春叢敷燧燧揚華英駢羅良可
佳疲繭宜見矜安得畦畹餘種食羽翼生

答崔象之見謝之作

陰風吹沙走長衢方駕往過君之廬主人好事樂閒尚
揖我謂我非俗儒欣然開館掃塵榻語論清簡發不虛
投冠釋帶聊自放安用俗禮空因拘分朋四座鬪巧奕

聊以勝負為歡娛呼兒稍稍出珍玩癭器礪砢承枯株
持竿拂壁似有重最後乃挂雙海圖云昔武皇恃威壯
驅石塞海怪可吁鞭笞鬼神各就事簸弄旗幟翻以舒
魚龍驚逃波浪惡左右出沒揚牙鬚但憐物類頗幽怪
畫手安辨曹與吳北軒却下步小徑竹深桂淨何縈紆
我來方冬氣凜冽已愛翠色侵衣裾即看春風撼芽中
定見紅紫相欹扶乘閒取醉更何適主人勿遽嫌喧呼

送孔先生還山

先生樂道者於世淡無欲高風自絕人正行不違俗竭
來城闕游不受塵事觸日久望林壑駕言反幽築家臨
渚水陽路轉春山曲東風吹百花紅紫滿巖谷蠶桑事
未起農里得徵逐社酒濁易求山蔬晴可斲幽尋月吐
嶺高卧日照屋應念塵中人胡為自羈跼

送謝師直歸馬上作

送客西郭門適與佳賞遇雜花被原野南盡遠目注樸
樸亂朱紛濛濛疑白霧林下風正柔繁香不飛去日長

人意閒歸騎款不遽陶然行且歌良愜靜者素却念陌上人春愁紛似絮

新植西軒

誰謂我圃隘我挿向盈畝鑿軒西臨兌規地北占酉陽
條散繁柔怒甲擎故朽封培童僕勞窺看孩稚走雖非
觀游盛要是吾廬有壤疏人力薄開發定遲後所賴春
風意與物無薄厚居閒日蕭散對此自成偶問吾何所
為卦象觀六九問誰之與處達者二三友為生昧機利

於事寡營取但願花常好酌我樽中酒

鋤園

上天浩無私衆草同一榮青青十步間薰臭相雜并卉
藥數不多十百其品名蔓者善緣附結陰在高覺脩竹
雖自立已復因纏縈其餘叢與株蕪沒不自呈陰蟲穴
其下日夜百種鳴紛然亂耳眼我意初不平朝鋤忽以
盡暮雨且復生自念疲病者莫與地力爭盛衰固物理
安用勞我形

孔先生以僊長老山水略錄見約同遊作詩答之
羣峰羅立青巉巉中有佛廟名香巖飛泉洶涌出峰後
四時激射喧蒼巖跳珠噴雪幾百丈下注坎險鍾為三
援蘿顚瞰石底淨明鏡光溢青瑤函淙流四走渠與竇
左右舂嚙何其饒緣源散討不知極但見洞穴爭欽嵌
攀藤直上出雲背巖戶閉邃疑神臧仰窺陰洞看懸乳
白龍垂鬚正盤髣或凝如蓋覆宛宛或散如指長摻摻
有臺高下且十數如以勢位相臨監平鋪老蘚柔可坐

誰藉綠罽遺不拈北山之石何瑣碎形制一一如鐫鑱
叩之清越諸谷應不意此地聞韶咸已霜桂樹垂凍壁
未臘梅蘂輝晴嵐浮屠曰僊好事者奄有勝跡窮搜探
書之遠寄龍山下云此僅止存都凡先生以本來示我
謂我所好同甘鹹相期歷覽在他歲事高意篤非予堪
人生蕭散不易得常苦世累為羈銜吾徒幸當治平日
況又無事於牽貪便須巾車不可後願以几杖從君南

西園

西園日修整竹樹相綴屬春華雖未敷氣象鬱含蓄密
雨昏遠林輕寒傍修竹於此隱几坐物我同一目弟妹
四五人時來問幽獨我云憂與樂在志所追逐無厭萬
鍾慊有道一簞足置是不須議春醪滿樽渌

治圃

久雨地氣泄百草日以滋勃然翳我圃積第不可治遂
令蕭艾質唐突蘭蕙姿鴻鵠不肯下跳蛙恃而嬉長林
困纏繞蘿蔓鬱四垂青雲避蒙密白日為蔽虧久與人

跡絕陰有物怪窺涉秋月既仲雍人事芟夷援斧一揮
拂榛蕪為之披俯憐蟻穴亂坐聽蟲響移濯濯行樹色
涓涓佳菊枝涼風自西來衆葉光參差墻堵豁已去南
亭見華榭却下走直道無復蛇虺疑維此峙嘉棚飲射
之所施蕩滌失前穢放懷得新怡如昔漢初定禮法壞
不支叔孫剗秦弊樹茅莚其儀皇皇天子庭一旦羅尊
卑表位肅以整衣冠紛陸離圓也不足道拔邪亦由斯
作詩試永歌憤涕下交頤

游城南雙塔院

軻峨郭南門臺殿壓長路青林四面合飛鳥不得度房
掩僧獨禪庭喧鷄正哺高蘿走蒼栢丹花下垂布中園
饒佳果結子滿朝露久從城邑居樂與清境遇坐聽百
禽響日晏不忍去微雨西北來颯爽動林莽歸鞅一回首
孤剎屹當午終期濯涼風杖策縱高步

同陳太丞遊龍興寺經藏院

空堂洒寒水碧楸涼漠漠高眠得珍簟委弃巾與屨薰

風穆然來殿角鳴金鐸清香有時聞幽鳥無聲落論詩
愛平淡語道造冲寞非吾方外友誰當共茲樂

和晏相公湖上遇雨

公堂日多暇薄暮遊清池孤雲從西來若與飛蓋期急
雨亂荷芰紅綠左右披沙禽帶濕起簇簇守前坻煙樹
晦空曲蟬聲寂無遺殘炎一洗濯霽景開林西禽飛還
清波蟬噪復故枝晚槿揚朱華秋草含碧滋篤舟出堤
去微風滿平猗卷幔極悵望正見隗與箕舉酒無塵情

慨然起遐思永懷古先訓默蹈通介宜乃知賢哲心所得非遊嬉

答曼叔見寄

日君同里閭杖履數相過靡為不吾咨有倡必君和春風南陌遊炎月北窗卧貪從德義樂不覺歲月破而君宦遊者動足落羈縶襄城雖近邑去局有重坐子來誠獨難我往義當果時天雨方霽綠樹垂檍檍策馬望城郭青山映煙火解衣塵慮清垂箔月華墮怜君九品賤

志尚勇不挫乃云曹事簡經史日自課出詩且百篇語
法就平妥相別不滿歲美譽亦已播顧慙糠粃姿幾不
見揚簸投章匪云報亦用警庸懦

答象之謝惠黃精之什

仙經著靈藥茲品上不刊服之歲月久衰羸反童顏巖
居有幽子乘時斲蒼山溪泉濯之潔秋陽暴而乾九蒸
達晨夜候火不敢安持之落城市誰復着眼看富貴異
所嗜口腹窮甘酸貧賤固不暇錐刀乃其干坐使至靈

物委棄同草菅惟君冲曠士敦然守高閒食之易為力
天和中自完故以此為饋其容幾一簞報我三百言浩
浩馳波瀾何以諭珍重如獲不死丹方當煩燠時把玩
毛骨寒它年靈氣成與子驂雙鸞

奉和象之夜飲之什

淫陰泄為雨十日瀉不停蓬蒿長四壁濁潦流縱橫嗽
嗽鶴羣游閭閻蛙亂鳴端居積幽抱沈鬱久未平是時
甫幾望月魄嚮已盈浮雲失四顧孤輪午亭亭微風濯

炎熱衣巾凜餘清起我不暇懶超遙步前庭煩憂忽以
去曠如出幽囿顧謂汝妻子速具煎炮烹同里四五人
予期得邀迎隨時具蔬菓飮餽甘與青雖無水陸珍亦
足侑盃觥所期在乘興豈問多品名諸君於我厚匪貌
實以情從容談笑間蕩不見府城有來必虛反觴至無
留行豈惟清言勝或以善謔并高風揖巢許曠論齊殤
彭不知軒冕貴直以道義榮置身豈非德撫事臨若驚
上天作陰沴降水災吾氓茫茫野郊外浩若翻滄溟垣

廬隨波盡稼穡安有成所聞此害廣郡國多所更吾君
急病民定見寬稅征困廩無益藏何以活鰥嫠我曾不
是恤方以口腹營念始昔從學潛心於六經頗知聖人
道要在及蒼生胡為取自足而不推其羸頽然度歲月
如龜守坳泓中而復自思此其義所寧聖朝盛搜拔列
位羅羣英晨興朝國門冠蓋多於星呈材必夔稷抗議
皆顛閔雙鳬與乘鴈未足關重輕奈何不知量欲以愚
自呈退之亦有云其猶進狶苓不如且飲酒茲事未易

平

同曼叔遊高陽山

久聞高陽勝近在汝州側
跂予三年望我願今卒獲煙
雲含兩山臺殿開半壁解鞍高林下
仰視怯登陟蒼松盤老枝矯矯入簷隙
微風韻其上落耳寒惻惻枇杷兩高樹
中國所未識葉間青實駢大與蜀土敵
我來暮春後花草已狼藉不見躑躅紅
西巖向人碧出門步榛薈微逕不可索
援蘿下幽澗剥蘚題蒼石鳥啼無定音
虎

闕有遺迹石臺平挺挺野竹瘦歷歷主人尉下邑奔走
因符檄喜我蕭散人幽奇共搜剔息陰時一憩貪勝還
自力歸時山氣冷草露濕遊屐舉手謝峰巒高秋復來
覲

同曼叔遊菩提寺

高城如破崖寺帶喬木古禪房掩清晝佛畫剝寒雨荒
池野蔓合濁水佳蓮吐蕭條聯騎遊淡薄對僧語秋風
日夕好勝事從此數

遊漢高帝祠

平橋架荒塹東上大岡尾岡頭古木合有廟蔭其底攝
衣陞殿輝龍顏嚴當几蝙蝠飛畫帳宣鼠噬珠旒墜不知
誰來祀狼藉樽與簋殘碑壓鼇背上有太和字去此數
百載文剝失所次伊人昔經構視漢猶視彼徘徊懷古
意日暮悲風裏

朝發靈樹寄曼叔師厚

朝發雲樹東曠野陰氣積驅馬入草間左右號鸛鷁重

雲默玄幕孤月隱白壁歎危涉淖轉側緣溝脉涼風
滿川陸眺覽多所適却想會合樂轉首已成昔諸君豪
俊士經訓飽搜擿上下古與今抗論堅莫敵顧我處其
間傾聽但跼蹐校士豈所當直以氣類得譬如禮天壇
圭璧奠且植陶匏以其質並列不為惑論心見表襮吐
口出白黑朝案每共飲夜牀仍抵蹠嘲諧間一發清笑
高啞啞自謂得如此至死無厭斂敢於百里間而憚轡
與策因詩謝所思酬篇無我默

渙城

駭駭二三騎南並橫山去山窮遠川出始見渙陽樹荒
城蘿蔦合表裏無寸土但聞鳥啼聲不見鳥啼處呼兒
開棘扉掃榻坐茅廬清泉給盥濯涼風生仰俯濁醪稍
似佳山菓來近圃始酌薰然和中飲淡無慮案頭伏羲
經編絕幾見補先生發其微大義談四五紛攘自諸家
簡易獨太古形骸非我有冠帶尚誰取道存固匪外兩
致默與語是時季春望山月夕已吐清光出深竹葉上

露如雨寒侵毛骨生思有煙霞舉却念人世間紛紛何足數

晚過象之葆光亭步月

浮沈閭里間放志謝維繫行貪月色靜歸犯霜華濕寒鼓出城重飛星過樓急却想竹庭下主人猶獨立

曉出郊過方秀才舍飲

浮雲散朝陰初日動晴煦行隨風葉遠去徬田家路人閒無遽色馬緩有安步遙識主人舍青帘出霜樹

送寧極還山

晨冰結車轍朔野風正厲君行良亦勤正與苦寒值超
然出門去曾不顧我議譬如雲飛鴻勢不受維繫開籠
恣其往萬里在展翅場功十月畢田家足幽事兒童樵
牧歸荆扉寂已閉燃薪燭茅屋並坐姪與弟自愛村醪
熟或以山鹿饋凍蔬斲青黃寒藥煮根柢從容溫飽間
萬事一無累嗟予不得往注目雲接地

答曼叔見謝穎橋相過之什

時寧極先
生同往

潁川今古賢豪多後生繼者為誰何吾交曼叔少挺出
力自樹立非由它潛心直欲到聖處論議不避況與軻
讀書下筆知所趣崇樹蘭茝遺萬莪軒昂頭角事高大
肯與世俗同其波一從得官坐山縣有如鷺鳥着網羅
朝符暮檄困奔走尚畏官長來誅訶時時矯首塵埃下
窺覩風月偷吟哦我憐軼才就羈絆歲一往視無蹉跎
扁舟遠放汝水岸濁酒暮醉高陽阿前時捧牒來潁上
謹視歛糴譏姦訛官曹寂寞古寺冷況值朔雪飛傿傿

馳書里中二三友固要以義當予過星言整駕夕已至
霜橋晚度冰戕戕燃薪暖我煩飲我斟酌脯醬調鹽醢
傾壺舉觴紛左右客飽而笑君顏醜危然正論中法義
豆籩羅列陳象犧嘲排乘醉忽以發駛如鑿水放九河
哀絃孤引四坐寂繼以簫笛相諧和先生久與人迹絕
心如止水形枯柯忽驚此樂非外獎不覺撫手促而歌
歸銜絡馬屢見奪欲去未忍還婆娑空堂想見別後意
一燈夜守陳編哦興來落紙成大句勢欲李杜相凌摩

緘題見寄邀以扣大江洶湧難為沱短篇澀訥非所報
為我揮筆芟煩苛

南溪

長林拂雲根一逕絕城腹荆扉帶翠樾斗下地愈束清
溪自南來勢抵北崖曲清平水流漫東去入脩竹境幽
百物遂魚鳥得所欲況依仁者居不與鉤彈觸有如佳
賓至相與娛聽矚鳥飛鳴我傍魚泳出深淥薄暮登前
岡四顧山在目雨滋春稼繁風動野花馥達人樂天性

不待外物足遂令茲地勝久不事營築顧我指崖下秋
當結茆屋渠波環古臺輦石坐幽澳霜前復來觀兔肥
山酒熟

陪寧極回馬上作

我有龍陽約垂駕輒復停念與高士期不宜後其行春
風三月尾澗谷花草明尋花踏幽草南出山脚青婆婆
一古樹是曰先生庭館我茅簷下山瓢日夕傾摘林飢
朱實掘竹羞紫萌朝聽谷禽響夜對山月清高論簡以

正疎懷淡無營徒知服深遠難用一善名維也少頑鈍
幾為世網嬰一親德義遊頗見外物輕門牆儻可依他
時來執經

答公懿以屢游薛園見詒

抱疴積閒縱世味頗能淡惟於山水娛自謂老不厭況
茲伊洛間久畜游賞念幽扉深隱竹小約度平塹解鞍
庇清陰拂席見殘豔長溪自南流小閣忽東瞰游人坐
兀兀鳴鳥來泛泛蟹潛石穴幽魚泳柳根暗川童或羣

嬉林女有孤覩醉觴豈留行吟筆靡停占臨歡興何長
遵事迹猶暫伊予志巖壑偶官祿石甌要須三徑足歸
跡便可斂買林接婆婆鑿澗分湫澁田廬常閉門野艇
時放纜聊書平生懷特為異時驗

寶應寺

林巒若無路鍾磬時出谷鑿石排僧龕研金畫佛屋日
沒上方夕明燈滿雲木

利涉塔院

院有呂文穆讀書
堂利涉法師塔

許公讀書地塵像一來拂門掩僧不歸簷低鶯飛出高
人不可見石塔鎮寒骨

盧溪

盧攜讀
書處

人沒已久溪溜亦如綫淳氣揖老僧清陰坐春院始
悟入山深幽林鳥聲變

西溪

我從南嶺來引轡下雲木不知溪流處但見翠滿谷涼
葉覆山泉脩篁翳茆屋

答原甫試墨見詒

金壺道人九法墨持賣都城人莫識君先得之寫大句
光與日彩相吞蝕句精墨妙氣怒豪意欲斬鯨連巨鼇
鯨鼇天地兩微物何足辱吾鈎與刀丈夫卷舒固有道
願君少安無草草都城不獨墨好酒亦好安得不飲自
枯槁

和原甫去年對雪思梅今年對梅思雪

中州寒燠與南異常恨梅花開不早今年朔雪冬不飛

臘月繁英似南好君憐芳物感時節愁見高風凍雲掃
苦嗟十九不稱意徒自令人顏色老雪遲梅早非我力
曾使金樽日傾倒

奉同原甫槐陰行

天門觀闕雙凌霞下有馳道開平沙高槐左右覆朱陞
綠陰翠氣相蒙遮朝回亘雲下寶騎游散掣電奔香車
我慙太學官況冷旦暮出此驅疲騶清風吹涼南就局
炎日轉景東還家昏然百事不知省空復春葉零秋華

和冲卿晚秋過金明池

聞君西郊行正值秋風晚清霜卷枯荷碧玉瑩池面浮
空結脩梁涌波抗華殿雲煙渺淨色覽望一蕭散縹思
暮春際都人盛嬉燕連帷錯繡綺方車驚金鈿填填鼓
鐘響耳目厭譁眩乃令塵囂辭而有清曠戀達人冥至
理喧寂無異觀偶然乘化往何適非汗漫吾知禦寇游
所樂在觀變

和永叔小飲懷同州江十學士

翰林文章伯好古名一世家無金壁儲所寶書與器北
堂冬日明有朋聯騎至新樽布几案二鼎屹先置大鼎
葛所銘小鼎澤而粹坐恐至神物光怪發非次羣賢刻
金石墨本來四裔紛攘羅卷軸指擿辨分隸其中石贊
藏家法非一二精莊與飄逸兩自有餘意興來輒長歌
歡至遂沈醉顏飢足簞瓢韓飲尚文字乃知內可樂不
必鐘鼓貴溫溫江馮翊茲理久所詣賦詩多雅言嗜酒
見淳氣歲晏不在席使我長嘆喟

奉同原甫賦澄心堂紙

江南國土未破前澄心名紙世已傳高堂久傾不復見
誰謂此物猶依然當時萬杵搗雲葉鋪出几案滑且堅
剡溪藤骨不足數蜀江玉屑誰復憐君臣嬉燕盛文采
駢章儷曲關巧儼一朝零落隨散地中原篋笥生光鮮
君安得此尚百幅題以大句先羣賢羣賢落筆富精麗
瓊琚寶玦相鈎聯嗟予材力豈當敵雖欲強賦何能妍
耽獨玩物古所戒崇尚浮藻政豈先江南可哀紙可惜

後有觀者存吾篇

同勝之明叔游東郊

仲冬景氣佳曠然思遠涉晨遵大堤去寒日在馬鬣浮
屠紅塵外樓殿煥層疊地遐景幽閑瑤碧秀林葉清香
時出箔餘經尚委笈躋閣眺遠陂浮陽來曠曠花枝亦
已柔行見春露浥久耽田野樂況與賢俊接逍遙永日
暇塵事不過睫昔人重時晷所志樹勲業慨予胡不然
空陋無所挾詩情朝生腸酒氣暮醺頰陶陶大化內得

此自為愜諸君能我從游屐方屢躡

次韻和平甫同介甫當世過飲見招

炎風得秋亦已涼喜抱塵策羅南窗策中古人不可見
獨詠君子予心降高文大論日傾吐響快有類鐘應撞
却嗟吾儕多暇日俚謠一作淫暴謔何其哢驅車正得我

所念起具有菽陳杯缸自憐愚慙接豪邁弊履乃與華
冕雙聖經王道有本末剽挹醇粹揮其危須臾上下今
與古武庫搜搜千矛縱疑懷滯義一開豁有如暗室來

明缸馮侯抗議亦殊健短鈎長缸相撐提介卿後至語
閑暇偃載戈甲韜旌幢弱弓枉矢尚何用久已束手甘
避逢是時君有山陽後扁舟已具河之缸朝吟淮山翠
撲撲夜夢楚水鳴淙淙軒然欲去坐所惜文字雅正姿
信恠行年三十不得飽況有薦道登朝邦遂令奔放不
自斂欲旅漁釣終湖江朝廷搜賢無遠近北盡塞漠南
嶺瀧如君才大齒且壯安可推亮而居龐
來詩云孔明勿問襄陽龐

功名得時看樹立豈若都尉眉空龐

和吳九王二十八雪詩

方冬氣潛溫得晚陰始重狂隨風力翻怒若雲面涌中
微玉霏肩後盛毛紛翫寒光動城闕甘滋入田壟鵬騫
海水飛驥憤鹽車更縈樓巧作層覆道高成角羣方破
昏霧萬物被光寵塗歌涵太和送賀仰高拱判官坐丞
華賦詩掩垂隴貂裘擁宵談金盃落晨捧此興吾不薄
君門旦當踵

答曼叔客居見詒兼簡里中諸君

少乏經世才引分甘自置不意田野姿尚為軒冕寄三
年太學館飽食無所議京都多賢豪出入許陪廁時從
騎省吟或就步兵醉低回衆人內自謂處身智耽耽秘
書府實待才俊地乃昏落其間衆口沸嘲詈茫如觸駭
機狂顧不知避忽逢故人來一道平生志歸心西南飛
勁疾霜後鷲遠慙龍陽隱

寧極處士

近愧葆光吏

象之官不
去里葆光

所居
亭名

詩以謝諸君顛冥非我事

南堂對竹懷江十鄰幾

端居無所聊稍覆治文字南堂冬日明窗戶暖可喜圖

書羅滿前意覽不由次聊收靜者趣以亂憂人思亭亭

當軒竹使我長歎喟封植苦不早顏色頗顚顚勁節亮

不改虛心如有遲紆懷江夫子循道久不試邈然高簡

姿不受世俗累一官才復進左謫良何亟德義我所珍

軒冕安能貴長嘯汝水濱濁醪日自醺效陶有新篇

君詩

多效
陶潛

翼孔著高議

君著春秋
左氏傳論

絃琴坐虛室默與古人值

顯晦一其心淡然天淳粹思之不可見暑謝寒已摯諒

非對此君茲懷何由慰

和子華兄晏王道損公字

濟濟高燕會衆賓且喜樂方冬氣常溫是日寒始若愁
雲際平林垂見雪花落四座喜相顧有引必虛爵中堂
豈非佳東圃羅帟幄當亭列射格抗的明灼灼彫弓既
出韞勁矢各在握主人揖讓興客以次序作目惴絲樹
移心傾鳴鼓數笑言何謹飭儀節亦稱娛酒酣事頗變
極口縱談謔失令固有罰出語輒見酌平生愛疎放論

議鄙齷齷歡來一狂散
宜顧醒後作詩人亦有言善戲
不為虐所賴衆君子濶達見表襮
還家遂酩酊豈復記鳴柝

送李寺丞宰藍田

李久
閒居

君誠巖壑徒出宰亦山縣
尚喜終南峰蒼翠不去眼
春風吹征車千里度灞澹
到日勝事繁花光老秦甸

又和楊之美家琵琶妓

楊君好古天下無自信獨與常人殊
勤身所營世或棄

反眼不顧我以趨彼其察物類有道能取精妙遺其麤
官卑俸薄不自給買童教樂收圖書客來呼童理絃索
滿面狼籍施鉛朱樽前一聽啄木奏能使四坐改觀為
歡娛有時陳書出衆畫羅列卷軸長短俱破縑壞紙抹
漆黑筆墨僅辨絲毫餘補裝斷綻搜尺寸分別品目窮
錙銖以茲為玩不知老自適其適誠君徒豈無高門華
屋貯妖麗中挂瑤圃崑崙圖青紅采錯亂人目珠玉磊
落熒其軀苟非絕藝與竒迹楊君視之皆蔑如楊君好

古天下無

遺吳冲卿大饗碑文

蒼碑剝龍螭突兀古殿側世變文字異歲久苔蘚蝕諒
非好事者塵土未嘗拭我來仰首看百過不自息曩者
魏方盛帝丕託威德馳驅百萬衆南指斗牛域誓將殄
氛祲飲馬長江邑翠華鬱回翔高會誇故國肅肅環珮響
煌煌羽旄飾鼓鐘何鏜鏘淮漢為震仄罷饗示得意搞
文永饒勒從臣梁孟皇隸法當世特奉詔無與讓淋漓

奮其墨爾來幾千歲卓卓見筋力端莊九鼎重勁挺羣
珪植威儀商山老氣象漢庭直惟昔銘枸戈先儒固難
迹況我蔽陋極視此空歎息常恐日磨滅不辨點與畫
呼工模於紙一掃見白黑緘包比瓊瑤把玩廢寢食于
時大經九有詔講謬忒刊之太學中為後代法式冲卿
邦家彥學問古今積辭端海鯨運筆力霜鷺擊況茲服
儒官洒翰固其職楷模所流傳歷世動千百自非體法
正徒使觀者惑厥初篆草隸根本君已極聊持釘張翫

金
度以參得失

飲聖俞西軒

歡常以飲合歡意則非外今吾二三子共此西軒會主
人吾儒秀言與二雅配酒行倡大論文字畧瑣碎上言
評人物要當本諸內下言譏為學不以滿自蔡唐之衆
詩人區別各異派一經君子評斂鑿音作棄秕糲予曰吾
聖俞名足通後代答我文如韓尚有六經在況吾何所
立聞譽若抱蠶聖俞善誘掖斯語不無戒意欲令吾曹

事業進以大我雖頑無能聞此亦健快呼觴滿自引不
畏坐客怪歸來書短扁聊以記所佩

答賀中道燈夕見詒

春風揭屋沙激窗兀然孤坐如植杠酒昏兩眸澀不視
案上書策徒擬擬獨待高篇恣哦詠頓覺精銳還軀腔
前時官家不禁夜九衢豔豔燒明缸綵山插天衆樂振
游人肩摩車轂撞君於此時守經籍直欲行業純不羗
想初嘉句落紙際筆下袞袞來長江我今散懶世味薄

惟於靜者心為降江翁蕭閑梅老淡文字酬酢交矛鏃
恨無奇麗與鬬角日策疲馬參其雙能來相從不憚數
與子賦詩傾酒缸

和如晦遊臨淄園示元明

平津開館大道西桃夭杏姁通園蹊東風入林朱白動
次第裝遍枝高低紅梅最好花正盛我時往看歸仍攜
爾來風雨就零謝忍見踏盡隨春泥廣文先生厭閑冷
投書結伴散馬蹄主人同僚相門出未肯朝暮甘鹽虀

歡然握手喜迎候促具並走子與妻插芳咀甘不知去
歸舍已見雞在栖坐揮大句鄙凡近脫落塵迹登天梯
不因時節自娛放頗置白黑為愁悽我昏如此漫不省
何異車鼓樂鸚鵡長安綠酒春正美與子一醉萬事齊
答和叔城東尋春

尋春之何許乃在城東隅東隅信佳處名園間精廬時
屬積雪霽田壤墳以蘇雍容二三騎並轡徐厥驅僕童
怪且議寒野安所娛不知陽和氣決滯于空虛仰視孤

剎起突兀疑神扶其下萬華屋碧瓦魚鱗鋪南行厯亭
館近接棟與櫨陰草含碧色陽條散紅腴周覽氣象嘉
高步形跡舒提攜上樽酒饌不過魚蔬為奉豈非薄歡至
自有餘却思九衢上車馬何區區紅塵塞兩眼勢利各
有趨雖欲求暇逸何能幸須臾君勿輕此樂此樂未易

圖

招景仁飲

紅薇花拆萱草丹萬鈴嘉菊重臺蓮問公此時胡不飲

樂有至理須鑽研后夔已遠師曠死寂寞千載無其傳
公窮天數索聖作坐使綠鬢成華顛屠龍絕藝豈世用
儀鳳至業非公專洛陽有客金石堅持議不屈難鑱鐫
園林獨樂會真率以勞效佚寧非偏古稱兩忘化於道
此理豈不曠且然折花持酒待公醉樂至無聲方得全
次韻和君實寄景仁

予年行七十惟日就志昏雖高鴻鵠舉尚困雞鶩喧壯
心久已摧弱羽不得翻每誦少游言顧慙下澤轅蜀公

有高志謝事久杜門擾擾世俗務不復挂口論羣經雜
圖史擁坐如周垣上談千載故速若水注盆客來必命
酒左右拱諸孫雖無歌舞歡自喜談笑溫仰高顧吾私
有類羝觸藩尚期蓬華完亦有桑榆存近觀敎子詩尤
見朋義敦卜居近吾廬指日駕君輶構堂始云基築圃
亦已樊前知會合期不慘離索魂想像入第初親賓燕
坐得談高一理會體王百疾奔共完天純粹豈識世詐
謖方笑司馬翁獨樂守空園

獨樂君
實園名

寄秦川馬從事

往歲游西謁季長隴雲秦樹勝風光分題紅葉蠻牋膩
對舉流霞綵袖香宴洽翠娥連象榻夜寒嬌鳳泥銀簧
未知早晚重攜手惆悵而今鬢已蒼

春霽憶洛陽

少年結客洛陽時閒飭東風駐馬蹄山色遠饒潘岳宅
波光輕撼窈娘堤花繁到處紅如堵酒好尋常醉似泥
賴有金臺舊知己應憐魂斷虎牢西

春朝

燕語聞多日蠶眠過幾宵花深不辨蝶柳暗欲迷橋便
面金環重障泥玉勒驕黃公酒壚上誰貰阮孚貂

晚春

春暉東去月收弦却拂凝埃敞北軒幾曲雲屏空白晝
一簾花雨自黃昏庭蕪碧合陰蟲息牕樹紅稀鬬雀喧
細憶舊歡都入夢習家池上子山園

象之以山藥見贈

龍山有游客贈藥滿筠籠
葉漬沙泉碧苗分石竇紅
斲應侵曉露來喜及春風
却笑丹砂遠辛勤勾漏翁

飲方君舍晚歸

慘淡秋原思歸鞍暮向城
野風吹酒散寒日上衣明
躑躅樵兒聚喧呼獵騎輕
村醪處處熟准擬數來行

自靜教院晚步溪上

雪盡岡頭路風和臘後天
人安閒淡內鳥下寂寥前
凍水晴初浪荒城晚自煙
西橋車馬急歸意尚留連

同化光陪寧極之渚陽城

不踏南溪路于今五換春能來再聯騎還是舊遊人置
酒真乘興談經或入神歡餘不無愧林壑未還身

之石橋

是日風
陰異常

聞說西橋水樹間不辭驅馬涉風煙疎籬老屋臨官道
瘦棘荒茅蔽石田欲下鳴鷄盤木末遠來驚雉落山前
瓢中幸有村醪美不怕春寒雨滿川

過邵先生居

竹塢斜開逕茅簷半卷書幽閒入高卧淡薄見平居亂
水隨顰引殘花不掃除因君動高興回首想吾廬

寶奎殿前花樹子去年與宋中道同賦今復答宋
詩

長條飛動不依欄淡粉濃朱巧作團無語不辭終日立
有情曾是隔年看春羅試舞衣新換古錦藏詩墨未乾
我為愁多悲節物欲酬佳句淚霑翰

和子華兄同永叔飲三班官舍兼約明日飲永叔

家

視草名臣潤色才玉墀晨退共徘徊朝廷無事文書省
臺閣相歡笑語開少厭賡酬停落筆旋尋歌舞約銜盃
廣文主簿官閒冷不是詩情豈合來

謁象之同諸君步之東禪院

二年憔悴走京塵匹馬歸來訪四鄰足滑舊語城下徑
眼明重見里中人青蔬不沒荒畦雪翠栢常留野殿春
風物自如人事改夕陽衰淚落衣巾

奉和喬年館宿

蓬萊仙構斗魁旁，遞直初登漢署郎。
雲向城頭收暝色，月從樓角放寒光。
行看砌菊嗟殘豔，坐對書芸襲暗香。
景物過清渾不寐，素經讐罷得新章。

時喬年
校醫書

寄題蘇子美滄浪亭

聞君買宅洞庭傍，白水千畦插稻秧。
生事已能支伏臘，歲華全得屬文章。
騫飛靈鳳知何暮，蟠螭蛟龍未可量。
莫以江山足清尚，便收才業傲虞唐。

寒食出郊

都門氣象雨餘佳，壓盡風塵見草芽。
日薄風和近郊路，朱紅粉白遠林花。
堤間獨去嬾珊女，柳下相逢輕轅車。
絲鬢未催樽酒在，不須辛苦問年華。

城西

繡鞅金羈十里塵，共傳恩詔樂芳辰。
千重翠木開珍園，百尺朱樓壓寶津。
御柳初長遮雉雉，宮花未識駭遊人。
自憐窮僻看山眼，來對天池禁禦春。

送劉景元觀察守襄陽

荊州太守駕朱轡寶筆題詩出御前
應歌笙歌消暇日
欲將才業効當年
千章翠木雲間寺
百丈清江雪後船
看取古來良吏迹
蒼碑突兀峴山巔

和伯壽秘監

曾陪道論接清歡
屈指如今四十年
不用笙歌娛上客
直將風月待高眠
黃花一醉猶能否
白首相逢是偶然
便欲投官結閒伴
家山況與碧嵩連

題卞大夫翠陰亭

新得亭名號翠陰
軒窗環合盡青林
定知野客先回顧
何處山禽自好音
池面有蓮風氣馥
城根多竹月華深
明年便作歸來計
應許攜樽與抱琴

和太素同看梅花寄子華

寒林凍卉誰觀者
繁豔清香自得之
天賦好花如有待
日尋幽徑不知疲
未逢驛使空懷遠
猶喜山翁亦好奇
昔歲一觴今一詠
共陶真意不為私

樂道示長句輒次韻

光陰不覺成陳迹事變何嘗有定期
身外閒愁無自入
飲中歡興未全衰
編排暑後新投酒
點檢秋來合唱辭
更欲邀君浮畫舫
藕花菱蔓滿西池

和詹叔遊廬山見寄

香爐峰色壓羣山
仰眺頻歌使者冠
江面煙波搖紫翠
佛宮金碧照清寒
密藏幽谷梅千樹
散走鳴泉竹萬竿
今日頓驚塵慮盡
一章佳句雪中看

和朱主簿遊園

白首昏昏度歲年，忽聞春至便開顏。
溪頭凍水晴初漲，竹下名園晝不開。
旋得歌辭教妓唱，遠尋梅艷喚人攀。
如今尚有官拘束，解組歸來始是閒。

登湖光亭

雪盡塵消徑露沙，公家池館似山家。
翠痕滿地初生草，紅氣通林未放花。
匝岸平波清照鴈，壓城危榭斗回鴉。
自慚白首猶圭組，此地年年賞物華。

公時遺石榴

高冠趨尹君方掾

成都

促席迎賓我已翁

河橋

交態不忘平

日厚歌聲猶似少年工
映階露菊秋吟苦
盈筥霜榴歲
問通每與東鄰話
知舊白頭強健幾人同

景仁

登城樓呈子華

麥苗黃熟稻苗青
餉婦耘夫笑語聲
樓上清風簾箔靜
田間白水鷺鷥輕
展親會集從容樂
娛老謳吟放曠情
羽孽漸消民食足
更無餘事計虧成

又和子華

沈陰消盡見春和，初放扁舟泝綠波。
水際踏青憐日暖，林間舉白為花多。
狂從田婦窺籬看，醉任家童刮鼓歌。
年少縱歡饒點檢，老懷終不挂誰何。

同化光飲象之家

又從鄰舍客來折，主人花游處當年。
似悲傷老去加興，長歌易放情密語無譁。
歸路生殘月，春風醉袂斜。

和謝主簿游西湖

雲陰開剥日光穿和氣隨風近酒船湖面波清渾見底
樓頭山碧自生煙興長不忍回孤棹歌懶才能逐緩絃
因子樽前話歸計醉魂先到峴山邊

景仁招況之聞用歌舞望門而反作詩戲之

一夜嚴風結素波盍簪寧避曉寒多范滂攬轡方清俗
墨子回車豈惡歌雲外雁寒驚歲晚林間鴉語弄春和
知君不久承寬詔始奈紅裙綠酒何

襄柑分惠景仁以詩將之

荊州解綬十經春迴夢青林遶漢濱霜氣輕寒催紺實
渚波餘潤作甘津僧園採掇寧論數客路奔馳竟占新
雪意垂收高會缺分金聊助席間珍

和三兄游湖

竹陰迴抱柳陰敷石色青青潤不枯暫到已驚風力勁
更清須待月輪孤波涵天影迷高下雲覆山光變有無暑
退疾清人意健縱吟狂醉是良圖

和景仁元夕

月上朱樓角風搖翠篠層傳聲迴步輦滿目爛行燈簫
鼓千門沸弓刀萬馬騰詩翁懷盛事眉雪慘霜稜
禁戶千通鼓天街萬點燈懷君瑩如玉驅馬不嫌冰
樂事看流俗狂游記舊朋回思真夢幻不待訪林僧

謝堯夫寄新酒

故人一別兩重陽每欲從之道路長有客忽傳龍坂至

開樽如對馬軍嘗

嘗怪杜詩曰洗盞開嘗對馬軍及得
錦屏山題名有寄河南府使馬軍送

新酒者然
後躍然

定將瓊液都為色疑有金英密借香却笑當

年彭澤令籬邊終日歎空觴

陶靖節云秋菊盈園而時醪靡至

和謝厚卿載酒見過

應為閒門境太清故攜歌管逐雙旌
酒逢歡後寧論量語到真時不屬情
木葉吟風千籟作菊叢含雨萬珠明
知公几案常豐暇詩思如泉日夜生

謝到水仙二本

黃中秀外幹虛通

此花外白中黃莖幹虛通如蔥本生武當山谷間士人謂之天蔥

乃

喜嘉名近帝聰密葉暗傳深夜露殘花猶及早春風拒

霜已失芙蓉豔出水難留菡萏紅多謝使君憐寂寞許
教綽約伴仙翁

觀安公亭戲呈觀文主人

十五年來此地行白頭重到不勝情梅寒未放黃金藥
冰綻初流碧玉聲憔悴霜松如有訴

庵前一松枯悴輒呼園吏汲水灌之

紛披風竹似相迎紅裙散後歌音絕海鶴堦前時一鳴

風流瀟灑
二俱不惡

寓展江亭謝堯夫寄酒及花

錯枉我先違陞石均勞公已下堤沙已欣晚歲逢良友
更喜高秋見好花旨酒芳新來似水危亭清絕至如家
三杯舉白歌相和忘却風前兩鬢華

哭蘇子美三首

未起蛟龍卧俄纏鵬鳥悲寢門號故友總帳哭孤兒業
履歸輿議銘文絕愧辭滄浪亭下路長負故人期

予與
子美

有滄浪之約
今則已焉

魄動書流創

子美去冬與予書
云貌無相見之期

誠通夢告悲

予夢若有
告子美亡

者旦而
得詩音

人生要有盡君沒竟何施
白日空塵几春風自
酒卮旅魂歸未得
藁葬近要離

才大終為累
冤深豈復論
幾年流落恨
千里寂寥魂
功業初懷負
風流秀句存
英靈邈無所
灑淚望閭門

和晏相公湖上四首

霧霽山高牖
天寒水落沙
試披深岸草
往往見黃花
穫水登紅稻
篙舟割紫菱
盃盤見秋物
江海思飛騰
風枝挂危葉
飛動夕陽中
莫遣兒童撼
留看著露紅

折葦隨風色枯荷盡雨聲平波極眼淨好放畫船行

答師厚夜歸客舍見詒

幽居直欲學忘言忍對賢豪遂默然談到精微夜寥閨
秋風時下竹窗前

和晏相公湖上十月九日

斷橋孤嶼寒光外短櫂輕舟斜照中未必江湖能勝此
野棠梨葉赤如楓

謝送妃子園荔枝

年年驛使走紅塵
貢入驪宮色尚新
妃子園名猶未改
一籠丹實寄閒人

酴醾花

細蓓繁英次第開
攀條盡日未能回
不如醉卧春風底
時使清香拂面來

城西書事五首

疏畦遶茆屋
林下輓轡遲
霜蔓已除架
風瓢空挂籬
朱果繁霜後
甘甜半自零
忽驚林色曙
零落見殘星

犬吠村墟改人移井臼空誰家收粟罷林脚有遺蓬
松陰不可憇冷冽恐飛霜時有高風過乾花落石牀
野竹濛荒塹寒花亂廢墟秋郊足幽事直欲帶經鉏

徐祕校過池上見訪留二絕句

依韻

樽酒浮多蟻舟蓬覆似蝸折楊爭貫鯉編竹自撈蝦
憐君此休駕長日坐傾斜山雨催行酒林煙候煮茶

洛城雜詩五首

分從柳外揚鞭去同作花前載酒行題得新詩無處寄

雜英飛絮滿春城

楊寺丞詩
見尋不遇

洗馬澗邊芳樹密欄干仍在碧流西香檀亂拍朱絃急

應有遊人醉欲迷

洗馬
澗

上東門外春三月桑葉陰陰覆菜花密竹亂流行逕絕

桔槔鳴處是人家

上東
門外

無數長條亂曉風誰將紫錦覆春叢殘英點落青苔面

獨倚朱欄細雨中

府署紫
錦帶花

櫻桃園裏鳴禽亂獬豸池邊積草多七十年前繁盛地

曲蹊深隧見張羅

會節園

惜餘醺

天意再三珍雅豔花中最後吐奇香
狂風莫掃殘英盡
留與佳人貯絳囊

陪晏相公遊韓王水磴園

行遍洛川南北岸
自憐探賞頗窮幽
不知物外清閑境
只在韓王水磴頭

出留守府之東游李相園趙令竹林觀楚家桂樹

子去歲數從元獻公為此行作三絕句以道悲
愴之意

府東朱戶昔嘗開日日從公選勝來游屐吟毫成故事
斷松飛溜有餘哀

李家池上朱櫻熟趙令林中錦穉春更欲題詩論舊賞
自慙非是絕絃人

曾陪樽酒詠芳叢今日遲留意不同

公詩云更作丹花
滿煙葉欲令佳客

剌遲紅萼似知人慘淡亂隨清淚落春風

西城

暖風和日著人來
細柳高榆抱逕回
我為傷春足悲恨
不禁驅馬上愁臺

右愁臺

太皇太后閣

鏤成寶字題宮戶
剪出名花趁御筵
人世不知春色早
忽驚歌吹下中天

太后閣

金花鏤勝隨春燕
綵杖縈絲逐土牛
迎得韶華入中禁

和風次第遍神州

綵杖朝來散玉京
綺窗新網結初晴
靜呼宮六教調曲
閑引皇孫看學行

皇后閣

紫蘭紅蓼簇春盤
曉逐金壺下大官
朝過三宮歸已晚
日華明麗雪消殘

夫人閣

漸暖正當挑菜日
輕陰漸變養花天
君王勤政稀游幸

院院相過理筦絃

宮娃拂曉已催班
拜謝春幡列御前
不待東風報花信
紅酥綵縷鬪芳妍

酴醾

平生為愛此香濃
仰面常迎落架風
每至春歸有遺恨
典刑猶在酒盃中

戲示程正叔范彝叟時正叔自洛中過訪

曲肱飲水程夫子
宴坐燒香范使君
顧我未能忘外樂

綠樽紅伎對朝暉

曲肱飲水一作閉門讀易宴坐燒香一作憶几燒香朝暉一作斜暉

卞仲謀入老會

同榜同僚同里客斑毛素髮入華筵
三盃耳熱歌聲發
猶喜歡情似少年

展江亭海棠四首

占盡人間麗與華
白頭判得醉流霞
誰將法錦翻新樣
紅綠裝成遍地花

昔年曾到蜀江頭
絕艷牽心幾十秋
今日欄邊見顏色

夢魂不復過西州

紅糝裝條嬝嬝長人間不合有天香

此花無香

千觴未足酬

佳麗回首東風更斷腸

又避寒風與暖曦年年長此探花期如今太守尤珍愛
只許宮娃戴一枝

和杜孝錫展江亭三首

斜日低雲動水光偶尋佳處閱羣芳
城闌不隔和風度
吹過千花百草香

驚鷺飛鳴避畫橈
游人笑語過朱橋
賈家園裏花應謝
綠遍牆頭野杏梢

世情未免歌紅粉
道韻無妨寄白雲
歸路看花應更好
林間明月涌金盆

和微之飲楊路分家聽琵琶

酒熟梅香臘後天
春鷺巧轉忽當筵
共嗤白傅辛勤甚
萬喚千呼始上船

朱絃四十昔嘗聞
藝不論多貴絕倫
少損新聲放平淡

免教醉殺白頭人

是夕微之
劇飲歡甚

再和堯夫同前

教得新聲十二絃
每逢嘉客便開筵
春湖水綠花爭發
好引紅粧上畫船

遇酒逢歌觸處春
白頭相視若天倫
須知丞相官儀重
不及琳宮自在人

閒居思湖上

遠泛每思隨鴈鶩
深居半是避杯觥
官閒日永無餘事

卧聽朱絃教曲成

庵中睡起五頌寄海印

窓間日射寒松影
枕上風傳過雁聲
夢境覺來元一際
不勞脣齒話無生

四山標韻出風塵
高下雖殊一色均
為我終朝談實相
參差庭栢敞精神


剡竹紉絲雖短長
誰教曲折號宮商
自從眠處知消息
終日笙歌是道場

飯後西堂百步行困來合眼是無營從生至老非他物
道著如今已是情

火衰水劣病餘身未散虛空一聚塵更欲強招年少客

折花同賞夢中春

宋詩鈔卷十七



總校官庶吉士臣張能照
校對官庶吉士臣陳文樞
謄錄監生臣沈元錡

欽定四庫全書薈要

集部
宋詩鈔卷十八

詳校官候選知縣臣吳甸華



欽定四庫全書薈要卷二萬二百七十一

集部

宋詩鈔卷十八

內閣中書舍人吳之振編

王安石臨川詩鈔上

王安石字介甫臨川人後居金陵亦號半山登進士
上第簽書淮南判官再調知鄞縣通判舒州召試館
職不就用為羣牧判官知常州移提點江東刑獄嘉
祐三年入為度支判官俄直集賢院明年同修起居

注知制誥糾察在京刑獄以母憂去終英宗世召不起神宗為太子時聞其名即位命知江寧府數月召為翰林學士兼侍講熙寧二年拜參知政事變行新法天下騷然罷為觀文殿大學士知江陵府再起為相屢謝病又罷為鎮南節度使同平章事判江寧府改集禧觀使封舒國公元豐三年復拜左僕射觀文殿大學士換特進改封于荆哲宗加司空卒贈太傳諡曰文配食孔廟追封舒王南渡後始罷從祀安石

少以意氣自許故詩語惟其所向不復更為涵畜後
從宋次道盡假唐人詩集博觀而約取晚年始悟深
婉不迫之趣然其精嚴深刻皆步驟老杜所得而論
者謂其有工緻無悲壯讀之久則令人筆拘而格退
余以為不然安石遺情世外其悲壯即寓閒澹之中
獨是議論過多亦是一病爾

元豐行示德逢

四山脩脩暎赤日田背坼如龜兆出湖陰先生坐草室

看踏溝車望秋實雷蟠電掣雲滔滔夜半載雨輸亭臯
旱禾秀發埋牛尻豆死更蘇肥莢毛倒持龍骨挂屋敖
買酒澆客追前勞三年五穀賤如水今見西成復如此
元豐聖人與天通千秋萬歲與此同先生在野故不窮
擊壤至老歌元豐

後元豐行

歌元豐十日五日一雨風麥行千里不見土連山沒雲
皆種黍水秧綿綿復多稔龍骨長乾挂梁梠鮐魚出網

蔽洲渚荻筍肥甘勝牛乳百錢可得酒斗許雖非社日
長聞鼓吳兒蹋歌女起舞但道快樂無所苦老翁塹水
西南流楊柳中間划小舟乘興欹眠過白下逢人歡笑
得無愁

純甫出釋惠崇畫要予作詩

畫史紛紛何足數惠崇晚出吾最許旱雲六月漲林莽
移我脩然墮洲渚黃蘆低摧雪翳土鳬雁靜立將儔侶
往時所歷今在眼沙平水澹西江浦暮氣沈舟暗魚罟

欹眠嘔軋如聞櫓頗疑道人三昧力異域山川能斷取
方諸承水調幻藥洒落生綃變寒暑金坡巨然山數堵
粉墨空多直漫與大梁崔白亦善畫曾見桃花淨初吐
酒酣弄筆起春風便恐飄零作紅雨流鶯探枝婉欲語
蜜蜂掇蕊隨翅股一時二子皆絕藝裘馬穿羸久羈旅
華堂豈惜萬黃金苦道今人不如古

招約之職方并示正甫書記

往時江總宅近在青溪曲井滅非故桐臺傾尚餘竹池

塘三四月菱蔓芙蕖馥蒲柳亦競時冥冥一川綠方抵
最所愛意謂可穿築欲往無舟梁長年寄心目故人晚
得此心事付草木消搖欄宇新攬結蹊隧熟更能適我
願中水開茅屋鬼營誅荒梗人境掃喧黷濠魚淨留連
海鳥暖追逐豈無方外客於此停高躅憶初桑落時要
我豈非夙蠶眠忽欲老一个未言速當緣東門水尚澀
南浦舳吾廬雖隱翳賞眺還自足橫陂受後澗直塹輸
前瀆跳鱗出重錦舞羽墮輒玉碧筩遞舒卷紫角聯出

縮千枝孫嶧陽萬本母淇澳滿門陶令株彌岸韓侯藪
尚復有野物與公新聽矚金鈿擁蕪菁翠被敷苜蓿蝦
蟆能作技科斗似可讀櫺軒俯北渚花氣時度谷耘鋤
聊效顰締構行可續荒乘倘不倦一晝敢辭卜雖無北
海酒乃有平津肉脩脩仙李枝城市久煩促寄聲與俱
來蔭我臺上穀

寄吳氏女子

伯姬不見我乃今始七齡家書無虛月豈異常歸寧汝

夫綴卿官汝兒亦搢紳兒已受師學出藍而更青女復
知女功婉嫕有典刑自吾捨汝東中父繼在廷小父數
往來吉音汝每聆既嫁遂願懷孰如汝所丁而吾與汝
母湯熨幸小停丘園祿一品吏卒給使令膏粱以晚食
安步而車駟山泉臯壤間適志多所經汝何思而憂書
每說涕零吾廬所封殖歲久愈華菁豈特茂松竹梧楸
亦冥冥芰荷美花實瀾漫爭溝涇諸孫肯來游誰謂川
無舲姑示汝我詩知嘉此林垌未有擬寒山覺汝耳目

熒因之授汝季季也亦淑靈

要望之過我廬

念子且行矣要子過我廬汲我山下泉煮我園中蔬知
子有仁心不忍釣我魚我池在人境不與獷獺居亦復
無蟲蛆出沒爭腐餘食罷往遊觀鱖鱖藻與蒲清波映
白日擺尾揚其鬚豈魚有此樂而我與子無擊壤謠聖
時自得以為娛

遊土山示蔡天啓秘校

定林瞰土山近乃在眉睫誰謂秦淮廣正可藏一牒朝
予欲獨往扶僊強登涉蔡侯聞之喜喜色見兩頰呼鞍
追我馬亦以兩點挾斂書付衣囊畏飯隨藥笈脩脩阿
蘭若土木老山脅鼓鐘卧空曠簋簠雕捷業升堂廓無
主考擊誰敢輒坡陀謝公冢藏椁久穿劫百金買酒地
野老今行饁紉懷起東山勝踐比稠疊於時國累卵楚
夏血常喋外實備艱梗中仍費調燮公能覺如夢自喻
一蝴蝶桓溫適自斃苻堅方天厭且可緩九錫寧肯快

一捷彼哉斗筭人得喪易矜怯妄言屐齒折吾欲刊史
牒傷心新城埭歸意終難愜漂搖五城舟尚想浮河槪
千秋籠東月長照西州堞豈無華屋處亦捉蒲葵簞碎
金諒可惜零落隨秋葉好事所傳玩空殘法書帖清談
眇不嗣陳迹恍如接東陽故侯孫少小同鼓篋一官初
嶺海仰視飛鳶跼窮歸放歟段高卧停遠蹠牽襟肘即
見著帽耳纔摩數椽危敗屋為我炊陳浥雖無膏污鼎
尚有羹濡筴縱言及平生相視開笑靨邯鄲枕上事且

飲且田獵或昏眠委翳或妄走超躡或叫號而寤或哭
泣而覓幸哉同聖時田里老安帖易牛以寶劒擊壤勝
彈鋏追憐衰晉末此土方岌業強偷須臾樂撫事終愁
慄予雖天戮民有械無接摺翁今貧而靜內熱非復葉
予衰極今歲儻與雞夢協委蛻亦何恨吾兒已長鬣翁
雖齒長我未見白可鑷祝翁尚難老生理歸善攝久留
畏年少譏我兩咄囁束火扶路還宵明狐兔懾蔡侯雄
俊士心憭形亦諲異時能飛鞚快若五陵俠胡為阡陌

間跣足僅相躡諒欲交轡語喏予不能噤

再用前韻寄蔡天啓

蔡侯東方來取友無所挾脩脩一囊衣偶以一書笈定
林朝自炊有匕或無筴時時羹藜藿鑊大苦難變驕頑
遂敢侮有甚觀駢脅澹然山谷中變色未嘗輒始見類
欺魄寒暄粗訓接從容與之語爛漫無不涉奇經可治
疾祕祝可解魘巫醫之所知瞽史之所業載車必百兩
獨以方寸攝微言歸易悟疾若髭赴鑷天機信卓越學

等何足躡縱談及既往每與唐許協揚雄尚漢儒韓愈
真秦俠好大人謂狂知微乃如謀惟知造文字人惑鬼
愁懾秦愚既改臯新眊仍易疊六書遂失指隸草矜敏
捷誰珍壇山刻共賞蘭亭帖東京一祭酒收拾偶予慙
少嘗妄思索老懶因退怯侯方習篆籀寸管靜嘗摩深
原道德意助我耕且獵昔功恐唐捐異味今得饒京口
媚學子追師嘗劫劫陸贏淮汴糧水飢湖海艤遠求而
近遺如目不見睫偽鳳易悅楚真龍反驚葉聞予再三

歎往往心不厭或自逸而走或吐而不嚼或嗤元郎漫

或訛白翁囁嚅金徒欲消韞玉豈愁浥賢愚有定分吐

汝無喋喋跨鞍隨我遊曳屣聯我跼照泉浥清泚跂石

緣鬼業東坡數儵魚西崦追蛺蝶翳林窺搏黍藉草聽

批頰黃尋遠蓮鬚紅閱鄰杏靨荏苒光景流楊園忽無

葉扶疴歸未久吾見喜寧帖褰裳告我去祿仕當隨牒

蕭晨秣欵段歸期得追躡謂言循東路覆出西城堞行

矣忍羈旅無魚勿彈鋏天閑久索驥駿足方騰蹕長驅

勿驕矜小跡亦勿慄鵬飛九萬里勿借風一筴溟波浩
難窮勉自養鱗鬣爵祿實天械功名為接摺寧能復與
我搖漾秦淮楫附書勿辭頻隔歲期滿篋

獨歸

鍾山獨歸雨微冥稻畦夾岡半黃青疲農心知水未足
看雲倚木車不停悲哉作勞亦已久暮歌如哭難為聽
而我官閒幸無事北窗枕簟風泠泠於時荷花擁翠蓋
細浪颺雪千娉婷誰能敬眼共此樂秋港雖淺可揚舲

車載板二首

荒哉我中園珍果所不產朝暮惟有鳥自呼車載板楚
人聞此聲莫有笑而莞而我更歌呼與之相往返視遇
若搏黍好音而睨睨壤壤生死夢久知無所揀物弊則
歸土吾歸其不晚歸歟汝隨我可相蒿里挽

鳥有車載板朝暮嘗一至世傳鵬似鴉而此與鴉似唯
能預人死以此有名字疑即賈長沙當時所遭值洛陽
多少年擾擾經世意粗聞方外語便釋形骸累吾衰久

捐書放浪無復事尚自不見我安知汝為異憐汝好毛
羽言音亦清麗胡為太多知不默而見忌楚人既憎汝
彈射將汝利且長隨我遊吾不汝羹哉

謝公墩

走馬白下門投鞭謝公墩昔人不可見故物尚或存問
樵樵不知問牧牧不言摩挲蒼苔石點檢屐齒痕想此
絳長檣想此倚短轅想此玩雲月狼籍盤與罇井邛亦
已沒漫然禾黍村摧藏羊曇骨放浪李白魂亦已同山

丘緬懷詩蘭蓀小草戲陳迹甘棠詠遺恩萬事付鬼錄
恥榮何足論天機自開闔人理孰畔援公色無懼喜儻
知禍福根涕淚對桓伊暮年無乃昏

明妃曲二首

明妃初出漢宮時淚濕春風鬢脚垂低徊顧影無顏色
尚得君王不自持歸來却怪丹青手入眼平生幾曾有
意態由來畫不成當時枉殺毛延壽一去心知更不歸
可憐着盡漢宮衣寄聲欲問塞南事只有年年鴻雁飛

家人萬里傳消息好在氍毹城莫相憶君不見咫尺長門
閉阿嬌人生失意無南北

明妃初嫁與胡兒氍毹車百兩皆胡姬含情欲說獨無處
傳與琵琶心自知黃金捍撥春風手彈看飛鴻勸胡酒
漢宮侍女暗垂淚沙上行人却回首漢恩自淺胡自深
人生樂在相知心可憐青塚已蕪沒尚有哀絃留至今

食黍行

周公兄弟相殺戮李斯父子夷三族富貴常多患禍嬰

貧賤亦復難為情身隨衣食南與北至親安能常在側
謂言黍熟同一炊欸見隴上黃離離遊人中道忽不返
從此食黍還心悲

送春

武陵山下朝買船風吹宿霧山花鮮萬家笑語橫青天
綺窗羅幕舞嬋娟小鬟折花叩船舷玉琰寫酒醺金錢
朱甍飛動浮雲巘天外筦簫來宛轉斷橋人行夕陽路
樓觀瑠璃影中見酡顏未分驂騶催燭入坐客猶徘徊

豈知閭闔門邊住春盡不見芳菲開日月紛紛車走坂
少年意氣何由挽洞庭浪與天地白塵昏萬里東浮眼
黑貂裘敝歸幾時相見綠樹啼黃鸝榮華俯仰憂患隨
命駕吾與高人期

酬王伯虎

吾聞人之初好惡尚無朕帝與鑿耳目賢愚遂殊品爾
來百千年轉化薄愈甚父翁相販賣浮詐誰能審睢盱
猴纓冠狼籍鼠穴寢滄海恐值到誰論魚鼈淦鴉聲雖

云惡革去在食甚嗟誰職教化獨使此風稔恬觀不知
救坐費太官廩予生少而戇好古乃天稟念此俗衰壞
何嘗敢安枕有時不能平悲吒失食飲唯子同我病亦
或涕沾衽謂予可告語密以詩來諭爛然辭滿紙秋水
濯新錦窮觀何拳拳靜念復凜凜賤貧欲救世無寧猶
拾瀋說窮且版築尹屈唯烹飪逢時豈遽廢避俗聊須
噤俎年幸未暮此意可勤恁

送潮州呂使君

韓君揭陽居戚嗟與死鄰呂使揭陽去笑談面生春當
復進趙子詩書相討論不必移鯉魚詭怪以疑民有若
大顛者高材能動人亦勿與為禮聽之汨彞倫同朝叙
朋友異姓接婚姻恩義乃獨厚懷哉余所陳

和吳沖卿雪

陽回力猶邐陰合勢方鞏填充空忽汗漫造物誰慙慙輕
於擘絮紛細若吹毛毳雲連晝已替風助宵仍洶憑陵
雖一時變態亦千種簾深卷或避戶隘關猶擁滔天有

凍浪匝地無荒隴飛揚類挾富委翳等辭寵穿幽偶相
重值儉輒孤聳積慘會將舒羣輕那久重紛華始滿眼
消釋不旋踵槁樹散飛花空簷落縣漣還當困炎熱以
此滌煩壅共約市南人收藏不為冗

和沖卿雪詩并示持國

地卷江海浮天吹河漢湧北風散作花巧麗世無種
霾昏得照曜塵滓歸掩擁荒林無空枝幽瓦有高隴
分纔一毛細聚或千鈞重飛颺窺已眩摧壓聽還
兇漁舟平

繫舷樵屨沒歸踵空令物象瑩豈免川塗壅爭光姮娥
妒失色羲和恐賴逢陽氣烝轉作水波溶舞庭稱賀嚴
掃路傳呼寵街遊謝壯少避卧甘閒冗吳侯絕俗唱韓
子當敵勇勝負觀兩豪吾衰但陰拱

北客置酒

紫衣操鼎置客前巾講稻飯隨梁鱸引刀取肉割啖客
銀盤擘臠薨與鮮殷勤勸侑邀一飽卷牲歸館觴更傳
山蔬野果雜飴蜜獐脯豕腊加魚煎酒酣衆吏稍欲起

北人捽耳爭留連為渠止飲且少安一杯相屬非偶然
奉使道中寄育王山長老常坦

道人少賈海上游海舶破散身沈浮抱金滿篋人所寄
吹簫偶得還中州羸身歸金不受報祇取斗酒相獻酬
歡娛慈母終一世脫棄妻子藏巖幽蒼煙寥寥池水漫
白玉菡萏吹高秋夜燃栢子煮山藥憶此東望無時休
塞垣春枯積雪溜沙礫盛怒黃雲愁五更匹馬隨雁起
想見鄮郭花今稠百年夸奪終一丘世上滿眼真悠悠

寄聲萬里心綢繆莫道異趣無相求

送李屯田守桂陽

泊船香爐峰始與子相識寄書邗江上詒我峰下石緣
以湘水竹攜持與南北永懷故人歡不願百金易竹枯
歸樵蘇石爛棄沙礫夷門得邂逅綠髮皆半白追思少
時事俛仰如一夕老矣無所為空知念疇昔常思一杯
酒要子相解釋出門事紛紛歸卧意還欲聞當上湓水
持詔守嶺阨方為萬里別執手先慘戚茲游信浩蕩山

水多所得為我謝香爐風塵每相憶

送程公闢守洪州

畫船插幟搖秋光鳴鐃傳鼓水洋洋豫章太守吳郡郎
行指斗牛先過鄉鄉人出郭航酒漿魚鱸魚炊稻梁
芡頭肥大菱腰長醕醢喧呼坐滿床怪君三年滯瞿塘
又驅傳馬登太行纓旄脫盡歸大梁翻然出走天南疆
九江左投貢與章揚瀾吹漂浩無旁老蛟戲水風助狂
盤渦忽圻千丈強君聞此語悲慨慷迎吏乃前持一觴

鄱州歷選多雋良鎮撫時有諸侯王拂天高閣朱鳥翔
西山蟠繞鱗鬣蒼下視城塹真金湯雄樓傑屋鬱相望
中戶尚有千金藏漂田種杭出穰穰沈檀珠犀雜萬商

大舟如山起牙樯

一本無此一句

輸瀉交廣流荆揚輕裙利屐

列名倡春風蹋謠能斷腸平湖灣塢煙渺茫樹石珍怪
花草香幽處往往聞笙簧地靈人秀古所臧勝兵可使
酒可嘗十州將吏隨低昂談笑指麾回雨暘非君才高
力方剛豈能跨有此一方無為聽客欲霑裳使君謝吏

趣治裝我行樂矣未渠央

東門

東門白下亭摧甃蔓寒葩淺沙找素舸一水宛秋蛇
漁商數十室門巷隱桑麻翰林謫仙人往歲酒姥家
調笑此水上能歌楊白花楊花飛白雪枝裏綠煙斜
舞袖卷煙雪綺表明紫霞風流翳蓬顆故地使人嗟
迢迢陌頭青空復可藏鷗

和王微之登高齋三首

寒雲沈屯白日埋河漢蕩圻天如筵衡門兼旬限泥潦
卧聽窾木鳴相挨蕭辰忽掃纖翳盡北嶺初出青嵬嵬
微之新詩動我目爛若火齊金盤堆想攜諸彦眺平野
高論歷詆秦以來觥船淋浪始快意忽憶歸雲胡為哉
念君少壯輟游衍發揮春秋名玉杯書成不得斷國論
但此空語傳八垓登臨興罷因感觸更欲遠引追宗雷
君知富貴亦何有諂譽未足償譏排風豪雨橫費調燮
坐使髮背為黃台留賓往往夜參半雖有罇俎無由開

江南佳麗非一日況乃故園名池臺能招過客飲文字

山水又足供歡咍剩留官屋貯酒母取醉不竭當如淮

六朝人物隨煙埃金輿玉几安在哉鍾山石城已寂寞

祇見江水雲端來百年故老有存者尚憶世宗初伐淮

魏王兵馬接踵出旗纛千里相搪挨當時謀臣非不衆

上國拔取多陪臺龍騰九天跨四海一水欲阻為可咍

降王北歸樓殿圯棄屋尚鎖殘金堆神靈變化自真主

將帥何力求公台山川清明草木靜天地不復屯雲雷

使君登高訪古昔傷此陳迹聊持杯因留嘉客坐披寫
鄙渌笑語傾如篴酒酣重惜功業晚老矣萬卷徒兼該

攢峰列壑動歸興憂端落筆何崔嵬餘年無歡易感激
亦愧莊叟能安排青燈明滅照不寐但把君詩闔且開
干戈六代戰血埋雙闕尚指山崔嵬當時君臣但兒戲
把酒空勸長星杯臨春美女閉黃壤玉枝自一作蕊繁

如堆後庭新聲散樵牧興廢倏忽何其哀咸陽龍移九
州圻遺種變化呼風雷蕭條中原碣無水崛起又此憑

江淮廣陵衣冠掃地去穿築隴畝為池臺吳儂傾家助
經始尺土不借秦人篋珠犀磊落萬艘入金壁照耀千
門開建隆天飛跨兩海南發交廣東溫台中間業業地
無幾欲久割據誠難哉靈旗指麾盡貔虎談笑力可南
山排樓船蔽川莫敢動扶伏但有謀臣來百年滄洲自
潮汐事往不與波爭迴黃雲荒城失苑路白草廢時空
壇堦使君新篇韻險絕登眺感悼隨嘲哈嗟予愁憊氣
已竭對壘每欲相劇揆揮毫更想能一戰數窘乃見詩

人才

書任村馬鋪

兒童繫馬黃河曲近岸河流如可掬
任村炊米朝食魚日暮滎陽驛中宿
投老經過身獨在當時洲渚今平陸
秣黍冥冥十數家仰視荒蹊但喬木
氷盤羹美客自知起看白水還東馳
爾來百口皆年少歸與何人共此悲

葛蘊作巫山高愛其飄逸因亦作一篇

巫山高偃薄江水之滔滔水於天下實至險山亦起伏

為波濤其巔冥冥不可見
崖岸斗絕悲猿猱赤楓青櫟
生滿谷山鬼白日樵人遭窈窕
陽臺彼神女朝朝暮暮
能雲雨以雲為衣月為褚
乘光服暗無留阻崑崙曾城
道可取方丈蓬萊多伴侶
塊獨守此嗟何求況乃低徊
夢中語

和王勝之雪霽借馬入省

泥水填馬不受轍瓦雪得火猶藏溝
宿霧紛紛度城闕
朔氣凜凜吹衣裘窮閭閉門無一客
剥啄驚我有前騶

強隨傳呼出屋去鼻息凍合髭繆繆投韁馬鬣任欹側
欲出操筆手還抽行思江南悲故事溪谷冬暖花常流
前年臘歸三見白霽色嶺上班班留杖藜此時將邑子
登眺置酒身優游豈如都城今日事祇恐一蹶為親憂
因知田里駕欵段昔人豈即非良謀君家洛陽名實大
談笑枯槁回春柔平生意氣故應在白髮未敢相尋求
從容退食想佳節豈無歌聲相獻酬奈何亦作苦寒調
歎息朝夕無驂騑超然遂有江湖意滿紙為我書窮愁

相如正應居客右子路且莫乘桴浮

和吳沖卿鵝鳴樹石屏

寒林昏鵝相與還下有跂石蒼孱顏曾於古圖見髣髴
已怪刀筆非人間君家石屏誰為寫古圖所傳無似者
鵝飛歷亂止且鳴林葉慘慘風煙生高齋日午坐中見
意似落日空上行君詩雄盛付君手云此非人乃天巧
嗟哉渾沌死乾坤至造作萬物醜妍巨細各有理問此
誰主何其精恢奇譎詭多可喜人於其間乃復雕鐫刻

畫出智力欲與造化追相傾拙者婆婆尚欲奮工者固
已窮夸矜吾觀鬼神獨與人意異雖有至巧無所爭所
以號山間埋沒此寶千萬歲不為見者驚吾又以此知
妙偉之作不在百世後造始乃與元氣并畫工粉墨非
不好歲久剥爛空留名能從太古到今日獨此不朽由
天成世人尚奇輕貨力山珍海怪採掇今欲索此屏後
出為君得胡賈欲價著不識吾知金帛不足論當與君
詩兩相直

送李宣叔倅漳州

關山到漳窮地與南越錯山川鬱霧毒瘴癘春冬作荒
茅簷竹間蔽虧有城郭居人特鮮少市井宜蕭索野花
開無時蠻酒持可酌窮年不用客誰與分杯杓朝廷尚
賢俊磊砢充臺閣君能喜節行文藝又該博超然萬里
去識者為不樂予聞君子居自可救民瘼苟能禦外物
得地無美惡似聞最南方北客今勿藥林麓換風氣獸
蛇凋毒草如漳猶近州氣冷又銷錄珍足海物味其厚

不為薄章舉馬甲柱固已輕羊酪蕉黃荔子丹又勝楂
梨酢逢衣比多士往往在丘壑從容與笑語豈不慰寂
寞太守好觴詠嘉賓應在幕想即有新詩流傳至京洛
韓持國從富并州辟

韓侯冰玉人不可塵土襍官雖衆俊後名字久訇礪并
州天下望撫士威愛愜千金棄不惜賓客常滿閭遙聞
餘風高為子置一榻親交西門餞百馬驕襍還子材宜
用世談者為鳴咤矧今名主人氣力足呵飲推賢為時

輔勢若朽易拉會當薦還朝立子在閭闔惜哉秣騏驎
賦以升龠合咨予栖栖者氣象已摧塌他年佐方州說
將尚不納況於聲勢尊豈易取酬答有如持寸莛未足
感韉鞢顧於山水間意願多所合匡廬與韶石少小已
嘗蹋風遊會稽春雲宿天柱臘淮湖江海上慣食蝦蟹
蛤西南窮岷嶓東北盡濟漯身雖未嘗歷魂夢已稠沓
荆溪最所愛映燭多廟塔溪果點丹漆溪花團繡菴扁
舟信所過行不廢樽榼一從捨之去霜雪行滿頷思之

不能寐。慙若蜚蚋。方將築其濱。畢景謝。嚙啗。安能孤
此意。顛倒就衰颯。唯子余所嚮。嗜好比鸚鵡。何時歸相
過。遊屐尚可蠟。

寄王逢原

北風吹雲埋九垓。草木零落空池臺。六龍避逃不敢出
地上。獨有寒崔嵬。披衣起行愁不愜。歸坐把卷闔且開。
永懷古人今已矣。感此近世何為哉。申韓百家熱火起。
孔子大道寒於灰。儒衣紛紛欲滿地。無復風焰空煤炰。

力排異端誰助我憶見夫子真奇材
梗枿豫章槩白日祇要匠石聊穿裁
我方官拘不得往子有閒暇宜能來
晤言相與入聖處一取萬古光芒迴

送裴如晦即席分題

以黯然消魂惟別而
已為韻擬而字韻作

十月欵水冰問君行何為行不顧斗米自與五湖期
平生湖上遊幽事畧能知此後君最樂窮年得游嬉
彩鯨抗波濤風作鱗之而鳴鼓上洞庭笑看紅橘垂
漠漠大梁下黃沙吹酒旗應憐故人愁回首一相思

吳長文新得顏公壞碑

魯公之書既絕倫歲久更為時所珍
荒壇壞冢朽崖屋剝落風雨埋煨塵
斷碑數尺誰所得點畫入紙完如新
延陵公子好事者拓取持寄情相親
六書篆籀數變改訓詁後世多失真
誰初妄鑿妍與醜坐使學士勞骸筋
堂堂魯公勇且仁出遇世難親經綸
揮毫卓犖又驚俗豈亦以此誇常民
但疑技巧有天得不必勉強方通神
詩歌甘崇美召伯愛惜蔽芾由思人
時危忠誼常恨少

寶此勿復令埋堙

悼四明杜醇

杜生四五十孝友稱鄉里隱約不外求耕桑有妻子藜
杖牧雞豚筠筒釣魴鯉歲時沽酒歸亦不乏甘旨天涯
一杯飯夙昔相逢喜談辭足詩書篇詠又清泚都城問
越客安否常在耳日月未渠央如何棄予死古風久凋
零好學少為已悲哉四明山此士今已矣

哭梅聖俞

詩行於世先春秋國風變衰始栢舟文辭感激多所憂
律呂尚可諧鳴球先王澤竭士已偷紛紛作者始可羞
其聲與節急以浮真人當天施再流篤生梅公應時求
頌歌文武功業優經竒緯麗散九州衆皆少銳老則不
翁獨辛苦不能休惜無采者人名道貴人憐公青兩眸
吹噓可使高岑樓坐令隱約不見收空能乞錢助饋餉
疑此有物司諸幽棲棲孔孟葬魯鄒後始卓犖稱軻丘
聖賢與命相楯矛勢欲強達誠無由詩人況又多窮愁

李杜亦不為公侯公窺窮阨以身投坎壈坐老當誰尤
吁嗟豈即非善謀虎豹雖死皮終留飄然載喪下陰溝
粉書軸幅懸無旒高堂萬里哀白頭東望使我商聲謳
別孫莘老

逢原未熟我已與子相知自吾得逢原知子更不疑把
手湖上舟望子欲歸時茫然乃分散獨背東南馳寥寥
西城居邂逅與子期雞鳴入省門朱墨來紛披含意不
自得強顏聊爾為會合常在夜青燈照書詩往往並衾

語至明不言疲，忽忽捨我去，使我當從誰？送子不出門，
我身方羈縻，我心得自如。今與子相隨，隨子在湖上，逢
原所嘗嬉。想見荷葉盡，北風卷寒漪。已懷今日愁，更念
昔日悲。相逢亦何有，但有鏡中絲。

示平甫弟

汴渠西受崑崙水，五月奔湍射黃矢。高淮夜入忽倒流，
碕岸相看欲生觜。萬檣如山屹不動，嗟我仲子行亦止。
自聞留連且一月，每得問訊猶千里。老工取河天上落，

伏礫澶沙卷無底土橋立馬望城東數日知有相逢喜
牆隅返照媚槐穀池面過雨蘇簟葦欣然把手相與閑
所願此時無一詭豈無他憂能老我付與天地從今始
閉門為謝載酒人外慕紛紛吾已矣

送董伯懿歸吉州

我來以喪歸君至因謫徙蒼黃憂患中邂逅遇於此去
年服初除聽赦相助喜看君數歸月但屈兩三指茫然
冬更秋一笑非願始籃輿楊柳下明月芙蕖水僮飢屢

閨門客罷方隱几是非評衆詩成敗
斷前史時時對奕石漫浪爭生死
送迎皆幅巾設席但陳米亦曾戲
篇章揮翰疾高矢君豪才有餘我老
憊先止東城景陽陌南望長干紫
欲斲三畝蔬於焉寄殘齒經過許
後日唱和猶在耳新恩忽捨我欣
悵生彼已江湖北風帆捩拖即
千里相逢知何時莫惜縑與紙

明州錢君倚衆樂亭

使君幕府開東部名高海曲人知
慕艤船談笑政即成

洗滌山川作嘉趣平泉浩蕩銀河注想見明星弄機杼
載沙築成天上路投虹為橋取孤嶼掃除荊棘水中央
碧瓦朱甍隨指顧春風滿城金版舫來看置酒新亭上
百女吹笙綵鳳悲一夫伐鼓靈鼉壯安期羨門相與遊
方丈蓬萊不更求酒酣忽跨鯨魚去陳迹空令此地留
和平甫舟中望九華山二首

楚越千萬山雄奇此山兼盤根雖巨壯其末乃脩纖去
縣尚百里側身勇前瞻蕭條煙嵐上縹渺浮青尖徐行

稍復逼所矚亦已添精神去疊疊氣象來漸漸卸席取
近岸移船傍蒼蒹窺觀坐窮晡未覺晷刻淹江空萬物
息四面波瀾恬我然九女鬟爭出一鏡匳卧送秋月沒
起看朝陽暹游氛蕩無餘瑣細得盡覘陵空翠轟直照
影寒鋸鋸冢木立紺髮崖林張紫髯變態生倏忽雖神
詎能占當留老吾身少駐誰云屢惜哉秦漢君黃屋上
衡轡等之事嬉遊捨此何其廉我疑二后荒神物久已
厭埋藏在雲霧不欲登昏愴又疑避褒封蔽匿以為謙

或是古史書脫落簡與籤當時備巡遊今不在絀縑終
南秦之望泰山魯所詹天王與秩祭俎豆羅醢鹽苟能
澤下民維此遠亦沾方今東南旱土脈燥不黏尚無膚
寸功豈免竊食嫌神莽吾難知士病吾能砭文章巧傳
會智術工飛箱薦寶互珪璧論材自梗枏苟以飾婦妾
謬云活蒼黔豈如幽人樂茲山謝閭閻穴石作戶牖垂
泉當門簾尋奇出後徑覽勝倚前簷超然往不返舉世
徒沾沾高興寄日月千秋伴烏蟾遐追商洛翁秦火不

能炎近慕楚穆生竟脫楚人鉗吾意竊所尚人謀諒難
僉

誰謂九華遠吾身未嘗詹唱篇每起予予口安能稍憶
在秋浦北空江上新蟾光潔寫一鏡迴環兩堤奩露坐
引衣襟風行欹帽簷維舟當此時巨細得盡瞻試嘗論
大略次乃述微纖此山廣以深包畜萬物兼噓雲吐霧
雨生育靡不漸巍然如九皇德澤四海沾此山相後先
各出羣峰尖毅然如九官羅立在堂廉挺身百辟上附

麗無姦愴此山高且寒五月不覺炎草樹萋已綠冰霜
尚涵淹頽然如九老白髮連蒼髯此山當無雲秀色鬱
以添姍然如九女靚飾出重簾珮環與巾裙紺玉青紈
縑遠之妍西施近或醜無鹽變態不可窮詩者徒咕咕
我初勇一往役世難安恬浪荒不走職民瘼當誰砭乖
離今數旬夢想欲窺覘自期得所如何啻釋囚鉗念昔
太白巔下視海日暹竭來天柱遊屐齒尚苔黏猶之健
飲食屢饗亦云饜胡為慕攀踏已憊且不嫌豈其仁智

心山水固所潛男兒有所學進退不在占功名苟不諧
廊廟等間閭況乃掄掾校其誰辨梗枿歸歟巖崖居料
理帶與籤得石坐兀兀逢泉飲厭厭取舍斷在獨豈必
詢謀僉子語實慰我寧殊邑中黔玉枝將在山當倚以
葭蒹詩力我已屈鋒鏐子猶銛扶復更一戰語汝其無
謙

和中甫兄春日有感

雪釋沙輕馬蹄疾北城可遊今暇日濺濺溪谷水亂流

漠漠郊原草爭出嬌梅過雨吹爛漫幽鳥迎陽語啾唧
分香欲滿錦樹園剪綵休開寶刀室胡為我輩坐自苦
不念茲時去如失飽聞高逕動車輪甘卧空堂守經帙
淮蝗蔽天農久餓越卒圍城盜少逸至尊深拱罷蕭韶
元老相看進刀筆春風生物尚有意壯士憂民豈無術
不成歡醉但悲歌回首功名古難必

寄曾子固

吾少莫與合愛我君為最君名高山嶽竭寧嵩與太低

心收憊友似不讓塵壒又如滄江水不逆溝畎澮君身
揭日月遇輒破氛靄我材特窮空無用補倉廩謂宜從
君久垢污得淘汰人生不可必所願每顛沛乖離五年
餘牢落千里外投身落俗窳薄宦自鉗鉞平居每自守
高論從誰丐搖搖西南心夢想與君會思君挾奇璞願
售無良僧窮閭抱幽憂凶禍費襁褓州窮吉士少誰可
媚諸妹仍聞病連月醫藥誰可賴家貧奉養狹誰與通
貨貝詩人刺曹公賢者荷戈役奈何遭平時德澤盛汪

歲鸞鳳鳴且下萬羽來翩翩
呦呦林間鹿爭出噬草賴
乃令高世士動輒遭狼狽
人事既難了天理尤茫昧
聖賢多如此自古云無奈
周人貴婦女扁鵲名醫滯
今世無常勢趨舍唯利害
而君信斯道不閔身窮泰
弃捐人間樂濯耳受天籟
諒知安肥甘未肯顧糠粃
龍螭雖蟠屈不慕蛇蟬蛻
令人重感奮意勇忘身
最何由日親炙病體同
砭艾功名未云合歲月
尤須惕懷思切磨効中
夜淚霑霑君常許過我
早晚治車軼山溪雖峻
惡高眺

發蒙肺峰巒碧參差木樹青掩謁桐江路尤駛飛槩下
鳴瀨魚村指暮火酒舍瞻晨旆清醪足消憂玉鯽行可
膾行行願無留日夕佇傾蓋會將見顏色不復謀著蔡
延陵古君子議樂恥言鄩細事豈足論故欲論其大披
披發韃橐凜凜見戈銳探深犯巖壁破惑翻強旂離行
步荃蘭偶坐陰松檜宵牀連衾幃晝食共簞糲茲歡何
時合清瘦見衣帶作詩寄微誠誠語無綵繪

有感

憶昔與胡子戲娛西城幽放斥僕與馬獨身步田疇牛
豎歌我旁聽之為久留一接田父語歎之勝王侯追逐
恨不恣暮歸輒懷愁顧常輕千乘祇願足一丘子時怪
我少好此寂寞遊笙篴不入耳又不甘醪羞那知抱孤
傷罷頓不能適世味已鮮少但餘野心稠乖離今十年
斑髮滿我頭昔興亦略盡食眠常百憂每逢佳山水欲
往輒復休方壯遂如此況乃高春秋

白紵山

白紵衆山頂江湖所縈帶浮雲卷晴明可見九州外肩
輿上寒空置酒故人會峰巒帳錦繡草木吹竽籟登臨
信地險俯仰知天大留歡薄日晚起視飛鳥背殘年苦
局束往事嗟摧壞歌舞不可求桓公井空在

九井

得盈字

沿崖涉澗三十里高下犖确無人耕捫蘿挽葛到山趾
仰見吹瀉何崢嶸餘聲投林欲風雨末勢卷土猶溪阮
飛蟲淩兢走獸慄霜雪夏落雷冬鳴野人往往見神物

鱗甲漠漠雲隨行我來立久無所得空數石上菖蒲生
中官繫龍沈玉冊小吏磔狗澆銀觥地形偶爾藏險怪
天意未必司陰晴山川在理有崩竭丘壑自古相虛盈
誰能保此千世後天柱不折泉常傾

書會別亭

西城路居人送客西歸處年年借問去何時今日扁舟
從此去春風吹花落高枝飛來飛去不自知路上行人
亦如此應有重來此處時

張氏靜居院

動者利進為靜者樂止居物性有偏得惟賢時卷舒張
侯始出遊所至多名譽老矣歸偃休買地斲荒蕪屋成
為令名名實與時俱南堂樓幽真晨起瞻像圖北堂畫
五禽游戲養形軀燕有諸賓庭學有諸子廬問侯年幾
何矯矯八十餘問侯何能爾心不藏憂愉問侯客何為
弦歌飲投壺問侯兒何讀夏商及唐虞嵩山填門戶洛
水遶階除疾於山水間結駟有通衢我念老退者古多

賢大夫留侯亦養生乃欲凌空虛閉門不飲酒豈異山
中臞疎傳稍喜客揮金能自娛不聞喜教子滿屋青紫
朱張侯能兼取勝事古所無褒稱有樂石丞相為之書
而我不自量聞風亦歌呼

禿山

吏役滄海上瞻山一停舟怪此禿誰使鄉人語其由一
狙山上鳴一狙從之遊相匹乃生子子衆孫還稠山中
草木盛根實始易求攀挽上極高屈指亦窮幽衆狙各

豐肥山乃盡侵牟攘爭取一飽豈暇議藏收大狙尚自
苦小狙亦已愁稍稍受咋嚙一毛不得留狙雖巧過人
不善操耒耨所嗜在果穀得之常以偷嗟此海山中四
顧無所投生生未云已歲晚將安謀

杭州修廣師法喜堂

浮屠之法與世殊洗滌萬事求空虛師心以此不挂物
一堂收身自有餘堂陰置石雙嵒嶸石脚立竹青扶疎
一來已覺肝膽豁況乃宴坐窮朝晡憶初救時勇自許

壯大看俗尤崎嶇豐車肥馬載豪傑少得志願多憂虞
始知進退各有理造次未可分賢愚會將築室返耕釣
相與此處吟山湖

復至曹娥堰寄剡縣丁元珍

溪水渾渾來自北千山抱水清相射山深水急無艇子
欲從故人安可得故人昔日此水上罇酒扁舟慰行役
津亭把手坐一笑我喜滿懷君動色論新講舊惜未足
落日低徊已催客離心自醉不復飲秋果寒花空滿席

今年却坐相逢處
怊悵難求別時迹
可憐溪水自南流
安得溪船問消息

寄贈胡先生

并序

孔孟去世遠矣
信其聖且賢者
質諸書焉耳
翼之先生與予
並世非若孔孟
之遠也
聞薦紳先生所稱述
又詳於書
不待見而後知
其人也
歎慕之不足
故作是詩

先生天下豪傑魁
胸臆廣博天所開
文章事業望孔孟

不復睥睨蔡與崔十年留滯東南州飽足藜藿安蒿萊
獨鳴道德驚此民民之聞者源源來高冠大帶滿門下
奮如百蟄乘春雷惡人沮服善者起昔時蹻跼今騫回
先生不試乃能爾誠令得志如何哉吾願聖帝營太平
補葺廊廟支傾頽披旒發纊廣耳目照徹山谷多遺材
先收先生作梁柱以次構架稍與攘羣臣面向帝深拱
仰戴堂陞方崔嵬

得曾子固書因寄

始吾居揚日重問每見及云將自親側萬里同講習子
行何舒舒吾望已汲汲窮年夢東南顏色不可挹仁賢
豈欺我正恐事維繫嚴親抱憂衰生理賴以給不然航
江外天寒北風急無乃山路惡僕弱馬行澁孤懷未肯
開歲物忽如蟄竭來高郵住巷屋頗卑濕蓬蒿稍芟除
茅竹隨補葺苟云禦風氣尚恐憂雨汁故人莫在眼屢
獨開巾笈忠信蓋未見吾敢誣茲邑出關誰與語念子
百憂集眺聽聊自放日暮城頭立徐歸坐當戶使者操

書入時開識子意如渴得美湑驪駒日就道玉手行可
執舊學待鐫磨新文得刪拾重登城頭望喜氣滿原隰
憶昨詩示諸外弟

憶昨此地相逢時春入窮谷多芳菲短垣困困冠翠嶺
躑躅萬樹紅相圍幽花媚草錯雜出黃蜂白蝶參差飛
此時少壯自負恃意氣與日爭光輝乘閒弄筆戲春色
脫畧不省旁人譏坐欲持此博軒冕言孔孟猶寒飢
丙子從親走京國浮塵全並緇人衣明年親作建昌吏

四月挽船江上磯端居感慨忽自寤青天閃爍無停暉

男兒少壯不樹立挾此窮老將安歸吟哦圖書謝慶吊
坐室寂寞生伊威材疎命賤不自揣欲與稷契遐相希
旻天一朝畀以禍先子泯沒予誰依精神汴離肝肺絕
皆血被面無時晞母兄呱呱泣相守三載厭食鍾山薇
屬聞降詔起羣彥遂占觀國趨王畿刻章琢句獻天子
釣取薄祿歡庭闈身著青衫手持版奔走卒歲官淮沂
淮沂無山四封痺獨有廟塔尤峩巍時時憑高一悵望

想見江南多翠微，歸心動蕩不可抑。
霍若猛吹翻旌旂，騰書漕府私自列。
仁者惻隱從其祈，暮春三月亂江水。
勁櫓健帆如轉機，還家上堂拜祖母。
奉手出涕縱橫揮，出門信馬向何許。
城郭宛然相識稀，永懷前事不自適。
却指舅館排山扉，當時髫兒戲我側。
于今冠佩何顛顛，況復丘樊滿秋色。
蜂蝶摧藏花草腓，令人感嗟千萬緒。
不忍倉卒回驂駢，留當開樽強自慰。
邀子劇飲毋子違。

東臯

起伏晴雲徑縱橫暖水陂草長流翠碧花遠沒黃鸝楚
製從人笑吳吟得自怡東臯興不淺游走及芳時

歲晚

月映林塘澹風含笑語涼俯窺憐淨綠小立佇幽香攜
幼尋新韻扶衰坐野航延緣久未已歲晚惜流光

半山春晚即事

春風取花去酬我以清陰翳翳陂路靜交交園屋深牀
數每小息杖屨或幽尋惟有北山鳥經過遺好音

敬眠

翠幙卷東岡
敬眠月半牀
松聲悲永夜
荷氣馥初涼
清話非無寄
幽期故不忘
扁舟亦在眼
終自懶衣裳

定林

漱甘涼病齒
坐曠息煩襟
因脫水邊屨
就敷巖上衾
但留雲對宿
仍值月相尋
真樂非無寄
悲蟲亦好音

送張宣義之官越幕


會稽遊宦鄉
海物錯句章
土潤箭萌美
水甘茶串香
今

君誠暫屈他日恐難忘唯有西興渡靈胥或怒張





宋詩鈔卷十八



總校官庶吉士臣張能照
校對官庶吉士臣陳文樞
騰錄監生臣周學淮